

Protocol dalla radunonza communal dils 27 da november 2020 allas 20.15 uras en casa da scola a Breil-vitg

Perstgisas: Richard Caduff, René Cavegn, Vic Desax

Presenza: 40 persunas

Tractandas:

1. Beinvegni ed approbaziun dil protocol dils 20 d'uost 2020
2. Preventiv e quen d'investiziun 2021
3. Pei da taglia 2021
4. Varia

Beinvegni ed avertura

Il president communal, Clau Schlosser, fa a tuts presents in cordial beinvegni, alla radunonza communal sut las cundiziuns spezialas cun tener distanza e purtar mascras. El declara als presents il concept da segirtad che vala per la radunonza communal.

Il president communal resumescha las lavurs principalas dil davos onn e tgei che ha fatschentau la suprastonza il pli fetg.

Sco dumbravuschs vegnan Sven Seeli, Vuorz ed Andreas Cadonau, Vuorz nominai ed elegi unanim.

La gliesta da tractandas, ch'ei stada publicada els davos fegls ufficials, vegn suttamessa alla discussiun. Da tala vegn buca fatg diever e per consequenza vegn la gliesta declarada ligionta per la radunonza communal da questa sera.

1. Approbaziun dil protocol dils 20 d'uost 2020

Il protocol ei staus exponius sin canzlia communal sco era sin la pagina d'internet dalla vischnaunca. Dalla discussiun vegn fatg negin diever. Il protocol dalla davosa radunonza communal vegn per consequenza approbaus cun 38 vuschs e 2 abstenziuns.

2. Preventiv e quen d'investiziun 2021

Il preventiv siara suenter expensas da frs. 12'982'150 ed entradas da frs. 13'247'081 cun in surpli entradas ell'altezia da frs. 264'931. Quei preventiv ei vegnius tschentaus si tenor la cefras dil quen 2019 ed il preventiv 2020. Il quen d'investiziun preveda expensas da frs. 4'960'000 ed entradas da frs. 1'103'000. Las investiziuns netto muntan per consequenza a frs. 3'857'000.

Il president communal repassa il preventiv dil quen current sco era il quen d'investiziun e dat sclariments necessaris tier tut las posiziuns. Dalla discussiun vegn buca fatg diever. Ils presents approbeschan il preventiv sco era il quen d'investiziun 2021 cun tscherna unanima e senza reservas.

Suenter l'approbaziun presenta il president aunc il plan d'investiziuns per ils proxims quater onns. Quei plan ei in instrument da lavur per la suprastonza ed aschia semida quel ualti spert. La radunonza pren enconuschientscha dil plan d'investiziuns per ils proxims quater onns.

3. Pei da taglia 2021

Mintg'onn han il cussegl da vischnaunca e la radunonza communal la pusseivladad da fixar il pei da taglia sin entradas sco era il pei da taglia sin schischom. Cun la fusiun ei il pei da taglia dalla vischnaunca da Breil vegnius fixaus sin 100% dalla taglia cantunala e quei sin fundament dallas investiziuns previdas per ils proxims 5 onns. La crisa da corona vegn a purtar a nus els proxims onns pli paucas entradas da taglia. Era spetga tenor il plan da finanzas in grond buordi d'investiziuns sin la vischnaunca, aschia ch'ei fuss ussa buca prudent da reducir il pei da taglia. Las investiziuns previdas els proxims onns savein mo far, sche las entradas da taglia restan sco tochen dacheu. Ina reducziun dil pei da taglia muntass stuschar anavos ni desister sin investiziuns. Igl uffeci da vischnauncas sco era la cumissiun da quen e gestiun sustegnan medemamein la proposta dalla suprastanza da buca sbassar il pei da taglia sin entradas. La taglia sin schischom sto tenor lescha da taglia vegnir fixada mintg'onn da niev. Quella taglia importa denter 1.5 entochen 2.0 promils. Il cussegl sco era la suprastanza communal fan la proposta schar il pei da taglia sin entradas da 100% e quel sin schischom sin 1.7 promils.

La damonda vegn suttamessa alla discussiun. Cunquei ch'ei vegn buca fatg diever dalla discussiun vegn passau tier la votaziun. Cun tscharna unanima decida la radunonza communal da fixar il pei da taglia ordinari sin 100% dalla taglia cantunala semplia ed il pei dalla taglia sin schischom sin 1.7 promils.

4. Varia

Clau Schlosser informescha la radunonza sur dil suandont:

Alla radunonza communal dils 20 d'uost 2020 ei vegniu decidiu d'instradar ina gruppa da lavur che fa propostas per novas tarifas per il diever d'aua e la deflussiun. Quella gruppa da lavur ei vegnida elegida e secumpona ord las suandontas personas: (Clau Schlosser, Heini Hunger, Sep Cathomas, Meinrad Schmed, Erwin Caduff, Adelrich Berther e Corsin Albin). Entochen oz havein giu duas sedutas. Igl ei previu da presentar el proxim onn ina proposta al cussegl da vischnaunca.

Clau Schlosser informescha la radunonza, che entgins vischins da Tavanasa han inoltrau la damonda d'inoltrar tempo 30 atras Tavanasa. Cheu setracta ei plitost dils possessurs da secundas habitaziuns e buca dils indigens. Suenten haver consultau las directivas cantunalas pertuccond il traffic sco era la polizia cantunala da traffic, ha la suprastanza decidiu, ch'ina introducziun da tempo 30 atras Tavanasa fetschi el mument negin senn. Ils iniziants ein vegni informai en in discuors personal giudlunder. El mument fuss ei buca bien d'instradar il tempo 30 a Tavanasa, e leu nua ch'ei ha in bionton dapli traffic (Danis e Dardin) far nuot.

Entgins geniturs da Danis han inoltrau in scriver alla vischnaunca cun la supplica da megliurar la situaziun e la segirtad per ils affons sin il plaz posta a Danis e Breil, cun erregier in passadi da peduns. En ina uatga sil plaz cun ils responsabels dil cantun ei vegniu analisau la situaziun. A Breil ei previu el 2021 ina schligiaziun. El project da sanaziun dalla via cantunala atras Danis, vegn empruau d'integrar e da megliurar la segirtad sin il plaz posta. El medem project vegn in evtl. tempo 30 atras Tavanasa e Danis integraus e sclarius giu.

Ina cumissiun preparatorica ha ellavurau ora per la suprastanza in concept per la cultura en l'entira vischnaunca. Igl ei previu da presentar el proxim onn la nova lescha da cultura.

Alla davosa seduta dil cussegl da vischnaunca ei Tarcisi Dietrich, Andiastr vegnius elegius sco niev president dil cussegl per il proxim onn. Sco vice-president havein elegiu Aluis Cahannes, Dardin.

Ord motivs professionals ha Sievi Sgier abdicau sco suprastont sin la fin settember 2020. Il president communal engrazia a Sievi per siu engaschia avon, duront e suenter la fusiun, seigi quei sco president communal d'Andiastr ni sco suprastont en la nova vischnaunca. Cunquei che Sievi sa buca esser presents questa sera, vegn surdau pli tard in present sco pign engraziament.

El proxim onn han liug las elecziuns communalas per la nova perioda d'uffeci 2022 – 2025. Tenor constituziun ston tut ils officials sedecider sch'els vulan candidar per la proxima perioda d'uffeci. La publicaziun ufficala el FUS suonda la fin schaner 2021.

Clau Schlosser engrazia per la presenza, la participaziun e la confidanza. El siara la radunonza allas 21:15 uras e giavischa a tuts in bi temps d'advent ed bien retuorn a casa.

Breil, 30 da november 2020

Il president

Clau Schlosser

Igl actuar

Curdin Cadonau